

Date – 20/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Myanmar raltlante kutzia leh mit-naute lakkhawm hna thawh bul tan na'n cheng nuai 38 ruahman phawt a ni.
2. Vawiin chawhma a Sairang Dinthar Veng-a lung lakna hmun chimah mi pakhat a thi.
3. Excise & Narcotics Department hnathawkte chuan nizan khan Champhai district-ah methamphetamine kg sawm chuang leh a neitu a puh mi 2 an man.
4. Thla leh Aug ni 21 thleng awh tur, Parliament in hnih Fur Thutkhawm, naktukah tan a ni dawn.

<><><>

BIOMETRIC ENROLMENT

Myanmar raltlante kutzia leh mit-naute lakkhawm hna thawh bul tanna atan cheng nuai 38 ruahman phawt a ni.

Tun July thla chawhnu lam atanga tan tum Mizorama Myanmar raltlan awmte biometric enrolment kalpui tanna tur atana sum ruahman chu cheng nuai 38 a nih thu home secretary Pu Vanlalmawia'n Akashvani Aizawl a hrilh a. Ngawrh taka inpuahchah chhovin July thla chung ngei a tan hman tura ruahmanna siam a nih thu a sawi a. Cheng nuai 38 hi a bul tanna atana senso ngai zat tur a nih phawt thu a sawi bawk. Senso zawng zawng hi ministry of home affairs (MHA) tum vek tur a ni chungin hna tan hi a hmanhawh thlak tawh si avangin Mizoram sorkar sum lo hman phawt a ni dawn ni a thudawn a ni a. Neih sa bakah computer, web camera leh hmanraw pawimawh dangte lei belh a ngai dawn a, lei belh mek zel a ni bawk. Enrolment portal hi National Informatics Centre (NIC) duan a ni a, Myanmar raltlante chhinchhiahna atan hian Foreigners Identification Portal & Biometric Enrolment (FIP&BE) chu hman a ni dawn a ni.

Tun dinhmunah Mizoramah Myanmar raltlan hi mi 32,504 an awm mek ni a chhinchhiah a ni a. Champhai district-ah tam berin, Lawngtlai district leh Siaha district te'n an dawt a ni. Kum 2021 February ni 1-a sipai-in Myanmar sorkar thuneihna an pawng lak hnu thla khat vel atang khan Myanmar atang hian raltlan awm tanin an tam lai berin sing nga an tling a ni.

<><><>

PM-DAJGUA

Chief Minister Pu Lalduhoma'n PM DAJGUA chu Mizoramah tha taka kalpui niin Department hrang hrangah hmalak a ni a ti a, mipui tam thei ang ber a huam thei na'n MLA bialah hmalakna kalpui a ni a ti bawk.

Chief Minister chuan Dharti Aaba Janjatiya Gram Utkarsh Abhiyan hnuaiiah hian Sawrkar Department 14 a awm tih sawiin Department 14 te hnathawh hrang hrang chu Planning Department atangin khaikhawm vek a ni a ti a, hmasawna chak zawka a awm theih nan Mizoram MLA bial tinah MLA-te'n mipui zirtir kawngah tan an la tih sawiin Department hrang hrangah hmalak a ni a ti bawk.

PM DAJGUA hi ram chhung a tlangmi hnam hrang hrang 700 chuangte tana a bik taka hamthatna leh hmasawna tura duan a ni a, he scheme hi India rama tlangmi vaibelchhe 5 ten an hlawkpui tura ruahman niin, Mizoram-ah pawh District zawng zawng 11 chhunga block 26 atangin khaw 383 thlanchhuah bikahkalpui ani a,heng khuate hi, Antyodaya Mission data atanga hmasawna ruhrel la famkim lohna report atanga thlan chhuahte an ni a. Mi nuai 4, leh 652 velin an chhawr tangkai tura ngaih a ni.

He ruahmanna hnuaiiah hian ei leh bar zawna leh khawtlang dinhmun chawikan te, ei/in tha leh zirna tha te, inkal pawhna thate, in leh lo tha zawk pek tum a ni a, he ruahmanna chungchanga Planning & Programme Implementation Department-a Deputy Advisor Pi Biakthansangi Hrahsel thusawi i lo ngaithla ang u.

<><><>

STONE MINE COLLAPSE

Nizan ruahpui vanawn sur avang khan vawiin chawhma khan Sairang Dinthar Veng-a national highway kawngpui bul, Zawngte Lui kawr kam lung lakna hmun chimah mi pakhat a thi.

Thu dawn danin lung lakna hmun chim hian a bul hnaia in pakhat, Pu Rotluanga kum 40 ,Hortoki luah lai chu a chim hnan a, hun engemaw chen lei laihna khawl leh mi tlawmngaite'n zawn hna an thawh hnuah Pu Rotluanga ruang hi lakchhuah a ni. Sairang, Dinthar Veng, YMA bul hmalaknain leimin hi thenfai hna thawh nghal a ni. Lengpui tumhmun panna kawnga Pukpui hmunah leimin nasa tak a awm a, lirthei eng chi mah kaltlang theih loh a nih hnu-in tunah chuan kaltlang theih a then fai a ni leh tawh ni-a thudawn a ni.

Disaster Management & Rehabilitation department atanga thu dawn danin Aizawl district-ah leimin 1 awmin kawng a hnawh a, Mamit district-ah leimin 5 awmin hmun 5-ah kawng a hnawh bawk a. Aizawl district-ah hian hmun pakhatah lung tla a awm bawk a ni. Mamit-a kan Corr sawi danin Mamit atanga Aizawl panna

kawngpui NH 108 chu leiminin a hnawh ping a. National Highway no. 108 Mamit leh Dapchhuah(Tut) inkar hmun 4 ah leiminin kawng a hnawh a. Mamit lam atanga kala Dapchhuah thlen dawn hnaihah kawng a bal bawk a, NH 108 tho Mamit leh Darlak inkarah pawh hmun 2 ah kawng a ping bawk. Kawngpui thenfai hna hi PWD Highway Division 1 in an thawk nghal a, tun dinhmunah Mamit khawpui chu Bairabi kawng atang chiahin a tlawhpawh theih niin Mamit a kan Corr chuan a sawi.

Hriat theih chinah Dapchhuah, Kawnmawi leh Tuirum khawchhung inkalpawhna kawng leimin in a hnawhping bawk a. Tut lui lian in Dilzawl khua ah lawng 4 a la bawk a, sangha dil sah a awm bawk.



OIL SCARCITY

Mizoram chak lak luhna kawngpui NH 306 a chhiat avanga tuialhthei phurte an tlan ngam loh avangin Aizawlah petrol leh diesel a vang tawh hle.

Aizawl khawpui chhunga Filling station hrang hrangte'n petrol leh diesel hralh chhuah tur an nei mumal tawh lo a, nimin khan tuialhthei tlem a zawng lo thleng awmin filling station thenkhatah pek a ni a, petrol leh diesel laktuma intlar an tam hle a ni. Filling station thenkhat chuan tanker rawn thleng a awm leh zauh zauh thin avangin hralh tur chu an la nei niin an sawi a, filling station thenkhat bulah man to zawka petrol hralh chhuak an awm reng bawk.

Kawnpui Police station atanga thu dawn danin nizan lam khan truck tangkhang eng emaw zat chu Aizawl lam panin rawn chhuah a ni a, hetih lai hian Kawnpui leh Sairang inkarah lirthei, bungraw phur leh dahzo tawh let leh tum tangkhang an la tam hle nia thu dawn a ni bawk.

Food, Civil Supplies & Consumer Affairs department hotute chuan kawng chhiaah tuialhthei phur tangkhang an tam avangin petrol leh diesel thleng tha lo mah se tuialhthei chu lut lo tawp a ni lo tih an sawi a, nimin lam khan Aizawla filling station zawng zawnga tualhtheih neih dan dinhmun tarlangin, diesel khawl sa litre nuai 1 chuang a awm thu leh, petrol pangngai pawh lirthei nuai 1 vel a awm thu an sawi a, petrol HP pawh litre sing 8 vel khawl sa awm meka ngaih a nih thu an sawi bawk. Filling station zingah tuialhthei litre sing chuang la nei mekte an awm avangin mipui tan chiai hluaina tur a awm rih loah an ngai bawk a ni.

He tih lai hian Aizawl leh Silchar inkar kawngpui National Highway a chhiat lutuk avang hian tuialhthei phur chauh ni lo, mipui nitin mamawh bakah insakna bungrua leh thil pawimawh dang phurtu truck-te pawh ke kawngpui a kal hi an tlem tawh hle a. Mizoram Truck Owners' Association (MTOA) general secretary Pu Dina Tlau chuan an member hmun thuma hmun hnih vel chu he lai kawngah hian bungraw phurin an kal tawh lo niin Akashvani Aizawl a hrihl a. Truck khaltu leh truck tan he lai kawng hi a hlauhawm lutuk tawh a, chubakah a chhiat lutuk avangin tlan aiin din a hlawk tawh zawk niin Pu Dina Tlau chuan a sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



METH SEIZURE

Excise & Narcotics Department hnathawkte chuan nizan khan Champhai district-ah methamphetamine kg sawm chuan an man a hemi kaihnawihah hian mi 2 an man bawk

Excise & narcotics department thupuangtu Pu Peter Zohmingthanga'n a sawi danin nizan dar 11:10 khan Champhai District-a Zokhawthar khaw panna bul, New Hruaikawn kawngah Methamphetamine Kg 10 leh Gram 100 (mum nuai 1 leh sang khat) leh a neitu nia puh – Lunminlalzo (34) Churachandpur, Manipur, tuna Champhai Vengthara khawsa mek nia inchhal chu an man. Methamphetamine phurhna atana a hman lirthei, Maruti 800 car, pawh hrensak nghal a ni. Tukin zing dar 8:45 khan Champhai, Mualbaw-ah heng Methamphetamine tawlh rukna a inhnawnawihah puh Christy Hmingthanzami (19) Champhai Vengthar-a khawsa nia inchhal pawh manleh ani a, heng Methamphetamine te hi state pawna hralh tur nia rin a ni.

Methamphetamine vanga mante hi Narcotic Drugs & Psychotropic Substances Act, 1985 tlawhchhanin thubuai siamsak an ni a, vawiin khan Champhai district court-ah hruai nghal an ni.

Tunlai hian Excise & Narcotics Department chuan Aizawl bakah District hmunpui hrang hrangah chhun leh zanah ruihhlo ngai, vaiin beihpui an thlak a. Ruihhlo ngaite thahnem tak hruaikhawmin an zilh thin a, an chhungte remtihna lak hnu-ah ruihhlo ngai enkawlina hmun hrang hrangah te an dah a, thenkhat chu Court thupek angin vantlang hmun pawimawh thenfaitir an ni a. Tunlaia Sawrkarin ruihhlo ngaite puala enkawlina a buatsaih, Hulhliap Short Stay Centre for Addicts-ah te dah an ni nual bawk.



MP ON AIR FARE

Rajya Sabha MP Pu K. Vanlalvena chuan Aizawl leh Delhi inkat thlawhna chuan man to lutuk chu vawiin khan Delhi-ah a sawi chhuak.

Naktuk atanga Parliament in 2 Fur thutkhawm tan tur inbuatsaihna a vawiin chawhma lama All Parliamentary Floor Leaders inhmukhawmna-ah Pu K. Vanlalvena chuan he thu hi sawiin tun thla ni 9 khan Aizawl atangin Delhi ah a chhuk a. Indigo airlines-ah chuanguin thlawhna ticket man hi Rs 25,951 zet a nih thu leh chu chu Delhi leh Indonesia khawpui Jakarta thlawhna chuan man ai pawha to zawk a nih thu a sawi chhuak a. Chubakah kum tinin Christmas dawn December thla bawr chhovah thlawhna ticket man Delhi leh Aizawl inkar hi Indigo Air service ten

an tih sân bik ziah thu a sawilang bawk a. Sawrkar laipui hnenah he harsatna hi sutkian sak turin a ngen a ni.

A thu sawi hian heta kalkhawm MP dang te beng a verh viau a a hriat thu leh a thusawi lai pawhin an lo thûm deuh hak niin Mizoram MP chuan a sawi a ni.

<><><>

PARLIAMENT MONSOON SESSION

Parliament fur thutkhawm chu naktukah tan a ni dawn a, thla leh Aug ni 21 thleng a awng. Session chung hian rorel inkhawm vawi 21 nei tura duan a ni.

Parliament Fur thutkhawm hi tuang taka neih anih theih nan vawiin khan sorkarin party hrang hrang thutkhawm a kova, union minister leh party hrang hrang hruaitute bakah Lok Sabha leh Rajya Sabha-a party hrang hrang floor leader-te an tel a ni. Thutkhawm neih zawha Pu Rijju-a'n thuthar lakhawmtute a kawmnaah thutkhawm hlawhtling tak an neih thu sawiin floor leader-ten session neih chung a thil ngaihpawimawh sawichhuah an duhte an tarlang, a ti a, sorkar chu Operation Sindoor chungchang ang thil pawimawh sawiho turin a inpeih reng a ni, a ti bawk.

<><><>